

摘藻堂四庫全書薈要

史部

欽定四庫全書薈要

史部
通志卷八十三下



詳校官員外郎臣楊世綸

欽定四庫全書薈要卷八千九百八十七

史部

通志卷第八十三下

宋 右 迪 功 郎 鄭 樵 漁 仲 撰

宋 室 傳 第 六

武帝八男

昭明太子統

子歡
子棟

歡 豫章王綜

南康簡王績

子會理
義理 通

廬陵威王續

子應

邵陵攜王綸

子堅
確

武

陵王紀

子圓照

正圓肅

圓

簡文諸子

哀太子大器

尋陽王大心

臨川王大欵

南

海王大臨

南郡王大連

安陸王大春

桂陽

王大成

汝南王大封

瀏陽公大雅

新興王

大莊

西陽王大鈞

武寧王大威

皇子大訓

建平王大球

義安王大昕

綏建王大摯

樂良王大園

元帝諸子

忠烈世子方等 貞惠世子方諸 愍懷太子方

矩 始安王方略

陳

永修侯擬 遂興侯詳 宜黃侯慧紀 衡陽獻

王昌

子伯信

南康愍王曇朗

子方泰慶

鄭萬頃

文帝諸子

始興王伯茂 鄱陽王伯山 新安王伯固 晉

安王伯恭 廬陵王伯仁 江夏王伯義 武陵

王伯禮 永陽王伯智 桂陽王伯謀

宣帝諸子

始興王叔陵 豫章王叔英 長沙王叔堅 建

安王叔卿 宜都王叔明 河東王叔獻 新蔡

王叔齊 晉熙王叔文 淮南王叔彪 始興王

叔重 尋陽王叔儼 岳陽王叔慎 義陽王叔

達 巴山王叔雄 武昌王叔虞 湘東王叔平

臨賀王叔教 陽山王叔宣 西陽王叔穆

南安王叔儉 南郡王叔澄 沅陵王叔興 岳

山王叔韶 新興王叔純 巴東王叔謨 臨海

王叔顯 新會王叔坦 新寧王叔隆 新昌王

叔榮 太原王叔匡

後主諸子

太子深 吳興王允 南平王嶷 永嘉王彥

南海王虔 信義王祗 邵陵王曄 會稽王莊

東陽王恠 吳郡王藩 錢唐王恬

梁

武帝八男

武帝八男丁貴嬪生昭明太子統簡文皇帝廬陵威王
續阮修容生孝元皇帝吳淑媛生豫章王綜董昭儀生
南康簡王績丁充華生邵陵攜王綸葛修容生武陵王
紀

昭明太子統字德施小字維摩武帝長子也以齊中興

元年九月生于襄陽武帝既年垂彊仕方有冢嗣時徐
元瑜降又荊州使至云蕭穎曹暴卒時人謂之三慶少
日而建業平識者知天命所集天監元年十一月立為
皇太子時年幼依舊居於內拜東宮官屬文武皆入直
永福省五年五月庚戌出居東宮太子生而聰叡三歲
授孝經論語五歲徧讀五經悉通諷誦性仁孝自出宮
常思戀不樂帝知之每五日一朝多使留永福省或五
日三日乃還宮八年九月於壽安殿講孝經盡通大義

講畢親臨釋奠於國學年十二於內省見獄官將讞事
問左右曰是皂衣何為者曰廷尉官屬召視其書曰是
皆可念我得判否有司以統幼給之曰得其獄皆刑罪
以上統皆署杖五十有司抱具獄不知所為具言於帝
帝笑而從之自是數使聽訟每有欲寬縱者即使太子
決之建康縣讞誣人誘口獄翻縣以太子仁愛故輕當
杖四十令曰彼若得罪便合家孥戮今縱不以其罪罪
之豈可輕罰而已可付治十四年正月朔旦帝臨軒冠

太子於太極殿舊制太子著遠游冠金蟬翠綵纓至是
詔加金博山太子美姿容善舉止讀書數行並下過目
皆憶每遊宴祖道賦詩至十數韻或作劇韻皆屬思便
成無所點易帝大弘佛教親自講說太子亦素信三寶
徧覽衆經乃於宮內別立慧義殿專為法集之所招引
名僧自立三諦法義普通元年四月甘露降於慧義殿
咸以為至德所感時俗稍奢太子欲以已率物服御朴
素身衣浣衣膳不兼肉三年十一月始興王憺薨舊事

以東宮禮絕傍親書翰並依常儀太子以為疑命僕射
劉孝綽議其事孝綽議曰按張鏡東宮儀記稱三朝發
哀者踰月不舉樂鼓吹寢奏服限亦然尋傍絕之義義
在去服服雖可奪情豈無悲饒歌輒奏良亦為此既有
悲情宜稱兼慕卒哭之後依常舉樂稱悲竟此理例相
符謂猶應兼慕請至卒哭僕射徐勉左率周捨家令陸
襄並同孝綽議太子令曰張鏡儀記云依士禮終服月
稱慕悼又云凡三朝發哀者踰月不舉劉僕議云傍絕

之義義在去服服雖可奪情豈無悲卒哭之後依常舉樂稱悲竟此理例相符尋情悲之說非止卒哭之後緣情為論此自難一也用張鏡之舉樂棄張鏡之稱悲一鏡之言取捨有異此自難二也陸家令止云多歷年所恐非事證雖復累稔所用意常未安近亦嘗以此問外由來立意謂猶應有慕悼之言張豈不以舉樂為大稱悲事小所以用小而忽大良亦有以至於元正六佾事為國章雖情或未安而禮不可廢鏡吹軍樂比之亦然

書疏方之事則成小差可緣心聲樂自外書疏自內樂
自他書自己劉僕之議即情未安可令諸賢更共詳衷
司農卿明山賓步兵校尉朱异議稱慕悼之辭宜終服
月於是付典書遵用以為永準七年十一月貴嬪有疾
太子還永福省朝夕侍疾衣不解帶及薨步從喪還宮
至殯漿水不入口每哭輒慟絕武帝勅中書舍人顧協
宣旨曰毀不滅性聖人之制不勝喪比於不孝有我在
那得自毀如此可即強進飲粥太子奉勅乃進數合自

是至葬日進麥粥一升武帝又勅曰聞汝所進過少轉就羸瘦我比更無餘病政為汝如此胸中亦填塞成疾故應彊加饘粥不使我恒爾懸心雖屢奉勅勸逼終喪日止一溢不嘗菜果之味體素壯腰帶十圍至是減削過半每入朝士庶見者莫不下泣太子自加元服帝便使省萬機內外百司奏事者填塞於前太子明於庶事每所奏謬誤巧妄皆即辯析示以可否徐令改正未嘗彈糾一人平斷法獄多所全宥天下皆稱仁性寬和容

衆喜愠不形於色引納才學之士賞愛無倦恒自討論
墳籍或與學士商榷古今繼以文章著述率以為常於
時東宮有書幾三萬卷名才並集文學之盛晉宋以來
未之有也性愛山水於元圃穿築更立亭館與朝士名
素者遊其中嘗泛舟後池番禺侯軌盛稱此中宜奏女
樂太子不答詠左思招隱詩云何必絲與竹山水有清
音軌慙而止出宮二十餘年不畜音聲未薨少時勅賜
太樂女伎一部畧無所好普通中大軍北侵都下米貴

太子因命菲衣減膳每霖雨積雪遣腹心左右周行閭巷視貧困家及有流離道路以米密加振賜人十石又出主衣絹帛每年常多作襦袴各三千領冬月以施寒者不令人知若死亡無可斂則為備棺槨每聞遠近百姓賦役勤苦輒斂客變色常以戶口未實重於勞擾吳郡屢以水災不熟有上言當漕大瀆以瀉浙江中大通二年春詔遣前交州刺史王奕假節發吳吳興信義三郡人丁就役太子上疏曰伏聞當遣王奕等上東三郡

人丁開漕溝渠導洩震澤使吳興一境無復水災暫勞
永逸必獲後利未萌難覩竊有愚懷如聞吳興累年失
收民頗流移吳郡十城亦不全熟唯信義去秋有稔復
非恒役之民即日東境穀價猶貴劫盜屢起在所有司
皆不聞奏今征戍未歸彊丁踈少此雖小舉竊恐難合
吏一登門動為民蠹又出丁之處遠近不一比得齊集
已妨蠶農去年粗為豐歲公私未能足食如復今茲失
業慮恐為弊更深日草竊多伺候民間虛寔若善人從

役則抄盜彌增吳興未受其益內地已離其弊不審可
得權停此功待優實以不武帝優詔以喻焉太子孝謹
天至每入朝未五鼓便守城門開東宮雖燕居內殿一
坐一起恒向西南面臺宿被召當入危坐達旦三年三
月游後池乘彫文舸摘芙蓉姬人蕩舟沒溺而得出因
動股恐貽帝憂深誠不言以寢疾聞武帝勅看問輒自
力手書啓及稍篤左右欲啓聞猶不許曰云何令至尊
知我如此惡因便鳴咽四月乙巳暴惡馳啓武帝比至

己薨時年三十一帝臨哭盡哀詔斂以衮冕諡曰昭明
五月庚寅葬安寧陵詔司徒左長史王筠為哀冊文朝
野惋愕都下男女奔走宮門號泣滿路四方毗庶及疆
徼之人聞喪者哀慟太子性仁恕見在宮禁防捉荆子
者問之云以荆子驅人太子恐復致痛使捉手版代之
頻食中得蠅蟲之屬密置枰邊恐厨人獲罪不令人知
又見後閤小兒攤戲後屬有獄牒攤者法士人結流徙
庶人結徒太子曰私錢自戲不犯公物此科太重令注

刑止三歲士人免官獄牒應死者必降長徒自此以下
莫不減半所著文集二十卷又撰古今典誥文言為正
序十卷五言詩之善者為英華集二十卷文選三十卷
薨後長子東中郎將南徐州刺史華容公歡封豫章郡
王次子枝江公譽封河東郡王曲江公訢封岳陽郡王
訢封武昌郡王鑒封義陽郡王各三千戶女悉同正主
蔡妃供待一同常儀唯別立金華宮為異帝既廢嫡立
庶海內噂喅故各封諸子大郡以慰其心岳陽王訢流

涕受拜累日不食初丁貴嬪薨太子遣人求得善墓地將斬草有賣地者因閹人俞三副求市若得三百萬許以百萬與之三副密啓武帝言太子所得地不如臣所得地於帝吉帝末年多忌便命市之葬果有道士善圖墓云地不利長子若厭伏或可申延乃為蠟鵠及諸物埋墓側長子位有宮監鮑邈之魏雅者二人初並為太子所愛邈之晚見疎於雅密啓武帝云雅為太子厭禱帝密遣檢掘果得鵠等物大驚將窮其事徐勉固諫得

止於是唯誅道士由是太子迄終以此慙媿故其嗣不
立後邵陵王臨丹陽郡因邈之與鄉人爭婢議以為誘
畧之罪牒宮簡文追感太子寃揮淚誅之邈之兄子僧
隆為宮直前未知為邈之姪即日驅出先是人間謠曰
鹿子開城門城門鹿子開當開復未開使我心徘徊城
中諸少年逐歡歸去來鹿子開反語為來子哭云帝哭
也歡前為南徐州太子果薨遣中書舍人臧厥追歡於
宗正殿解髮臨哭歡既嫡孫次應嗣立而遲疑未決帝

既新有天下恐不可以少主主大業又以心術故意在
晉安王猶豫自四月上旬至五月二十一日方決歡止
封豫章王還任往謠言心徘徊者未定也城中諸少年
逐歡歸去來復還徐方之象也歡字孟孫位雲麾將軍
江州刺史薨諡安王子棟嗣棟字元吉及簡文見廢侯
景奉以為主棟方與妃張氏鋤葵而法駕奄至棟驚不
知所為泣而升輦及即位升武德殿歔有迴風從地涌
起翻飛華蓋徑出端門時人知其不終於是年號天正

追尊昭明太子曰昭明皇帝安王為安皇帝金華敬妃
蔡氏為敬皇后太妃王氏為皇太后妃為皇后未幾行
禪讓禮棟封淮陰王及二弟橋樛並鎖於密室景敗走
兄弟相扶出逢杜崱於道崱去其鎖弟曰今日免橫死
矣棟曰倚伏難知吾猶有懼初王僧辯之為都督將發
詔元帝曰平賊之後嗣君萬福未審有何儀注帝曰六
門之內自極兵威僧辯曰平賊之謀臣為己任成濟之
事請別舉人由是帝別勅宣猛將軍朱買臣使行忍酷

會簡文已被害棟等與買臣遇見呼往船共飲未竟並
沈於水河東王譽字重孫普通二年封枝江縣公中大
通三年改封河東郡王累遷南中郎將湘州刺史未幾
侯景寇建業譽入援至青草湖臺城沒有詔班師譽還
湘鎮時元帝軍於武城新除雍州刺史張纘密報元帝
曰河東起兵岳陽聚米將來襲江陵元帝甚懼沈米斷
纜而歸因遣諮議周弘直至譽所督其糧衆譽曰各自
軍府何忽疑人使三反譽並不從元帝大怒遣世子方

等征之反為譽敗死又令信州刺史鮑泉討譽並陳示
禍福譽謂曰欲前即前無所多說泉軍於石柳寺譽逆
擊不利而還泉進軍橘洲譽攻之又見敗於是遂圍之
譽幼而有驍勇馬上用弩兼有膽氣能撫士卒甚得衆
心元帝又遣領軍王僧辯代鮑泉攻譽譽將潰圍而出
會其麾下將慕容華引僧辯入城遂被執謂守者曰勿
殺我得一見七官申此讒賊死無恨主者曰奉令不許
遂斬首送荊鎮元帝返其首以葬焉初譽之將敗引鏡

照面不見其頭又見長人蓋屋兩手據地噉其臍又見
白狗大如驢從城出不知所在譽甚惡之俄而城陷岳
陽王譽別有傳列在載記

豫章王綜字世謙武帝第二子也天監三年封豫章郡
王累遷北中郎將南徐州刺史入為侍中鎮右將軍初
綜母吳淑媛在齊東昏宮寵在潘余之亞及得幸於武
帝七月而生綜宮中多疑之及綜年十四五常夢一年
少肥壯自挈其首對綜如此非一綜轉成長心驚不已

頻密問淑媛淑媛問夢中形色頗類東昏因密報之曰
汝七月生兒安得比諸皇子汝今太子次弟幸保富貴
勿洩綜與淑媛相抱哭每日夜恒泣泣又每靖室閉戶
籍地被髮席藁輕財好士分施不輟唯留身上故衣厨
庫恒致罄乏常於內齋布沙於地終日跣行足下生胝
日能行三百里嘗有人士姓王以屯蹟告綜於時大乏
唯有眠牀故阜複帳即付之其降意下士以伺風雲之
會諸侯王妃主及外人並知此懷唯武帝不疑及長有

才學善屬文武帝御諸子以禮朝見不甚數綜恒怨不
見知每出蕃淑媛恒隨之至鎮時年十五尚裸袒戲嬉
於前晝夜無別妃袁氏尚書令昂之女也淑媛恒節其
宿止遇袁妃尤不以道內外咸有穢聲綜後在徐州政
刑酷虐又有勇力制及奔馬擲殺駒犢常陰服微行著
烏絲布帽夜出無有期度招引道士探求術數性聰敏
多通每武帝有勅疏至輒忿恚形於顏色帝性嚴厚臣
不敢輕言得失凡綜所為莫之知也於徐州還頻表陳

便宜求經畧邊境帝並優勅答之徐州所有練樹並令
斬殺以帝小名練故也累致意尚書僕射徐勉求出鎮
襄陽勉未敢言因是怒勉餉以白團扇圖伐檀之詩言
其賄也在西州於別室歲時設席祠齊氏七廟又累微
行至曲阿拜齊明帝陵然猶無以自信聞俗說以生者
血瀝死者骨血滲即為父子綜乃私發齊東昏墓出其
骨瀝血試之既有徵矣後生次男月餘日潛殺之既瘞
夜遣人發取其骨更試之其酷忍如此每對東宮及諸

王辭色不恭遜嘗改歲後問訊臨川王宏出至中閣登
宏羊車次遺糞而出居都下所為多如此者普通四年
為都督南兗州刺史頗勤於事而不見賓客其辭訟則
隔簾理之方幅出行垂帷於輿每云惡人識其面也初
齊故建安王蕭寶夤在魏綜求得北來道人釋法鸞使
入北通問於寶夤謂為叔父襄陽人梁話母死法鸞說
綜厚賜之言終可任使綜遺話錢五萬及葬畢引在左
右法鸞在廣陵往來通魏尤數每舍淮陰苗文寵家言

文寵於綜綜引為國常侍六年魏將元法僧以彭城降
帝使綜都督衆軍權鎮彭城并攝徐州府事武帝曉別
元象知當更有敗軍失將恐綜為北所禽手勅綜令拔
軍每使居前勿在人後綜恐帝覺與魏安豐王元延明
相持夜潛與梁詒苗文寵三騎開北門涉汴河遂奔蕭
城自稱隊主見延明而拜延明坐之問其名氏不答曰
殿下問人有見識者延明召使視之曰豫章王也延明
喜下地執其手答其拜送於洛陽及旦齋內諸閤猶閉

不開衆莫知所以唯見城外魏軍叫曰汝豫章王昨夜
已來在我軍中城中既失王所在衆軍乃退不得還者
甚衆湘州益陽人任煥常有驢馬乘之退走煥腳為抄
所傷人馬俱弊煥於橋下歇抄復至煥腳痛不復得上
馬於是向馬泣曰驢子我於此死矣馬因跪其前脚煥
乃得上馬遂免難綜長史江革大舟卿祖暉並為魏軍
所擒武帝聞之驚駭綜至魏位侍中司空高平公丹陽
王梁話苗文寵並為光祿大夫綜改名纘字德文追服

齊東昏斬縗魏太后及羣臣並弔八月有司奏削爵土
絕其屬籍改子直姓悖氏未及旬日有詔復屬籍封直
永新侯策免吳淑媛俄遇鴆而卒有詔復其品秩諡曰
敬使直主其喪及蕭寶夤據長安反綜復去洛陽欲奔
之魏法度河橋不得乘馬綜乘馬而行橋吏執之送洛
陽魏孝莊初歷位司徒太尉尚帝姊壽陽公主拜駙馬
都尉陳慶之至洛也送綜啓求還時吳淑媛尚在勅
使以綜小時衣寄之信未達而慶之敗綜後出為都督

齊州刺史驃騎大將軍開府儀同三司竇黃見禽綜拜
表為之請命爾朱兆入洛綜為城人趙洛周所逐公主
被錄送京爾朱世隆欲相陵逼公主守操被害綜既棄
州為沙門潛詣長白山未幾至陽平病卒初綜在魏不
得志嘗作聽鐘鳴悲落葉以申其志聞者悲之魏節閔
立迎綜喪以王禮與公主合葬於嵩山後梁人盜其柩
來奔武帝猶以子禮祔葬陵次直字思方位晉陵太守
沙州刺史

南康簡王績字世謹小字四果武帝第四子也天監七年封南康郡王十年為南徐州刺史時年七歲主者有受貨洗改解書長史王僧孺弗之覺績見而詰之即便首服衆咸歎其聰警十七年為都督南兗州刺史在州以善政稱尋有詔徵還百姓曹樂等二百七十人詣闕上表稱績尤異一十五條乞留為州任優詔許之普通四年徵為侍中雲麾將軍領石頭戍軍事五年出為江州刺史丁董淑媛憂居喪過禮固求解職乃徵授安右

將軍領石頭戍軍事尋加護軍羸瘠不親視事大通三年因感疾薨於任贈開府儀同三司諡曰簡績寡玩好少嗜欲居無僕妾躬事儉約所有租秩悉寄天府及薨後少府有南康國無名錢數千萬子會理嗣會理字長才少聰慧好文史年十一而孤特為武帝所愛衣服禮秩與正王不殊十五為湘州長史多信左右行事劉納每禁之會理心不平證以贓貨收送建業納歎曰我一見天子使汝等知會理厚送資糧數遣慰喻令心腹於

青草湖為盜殺納百口俱盡累遷都督南兖州刺史太清元年督衆軍北侵至彭城為魏師所侵退歸本鎮二年侯景圍城會理入援會北徐州刺史封山侯正表將應其兄正德外託赴援寔謀襲廣陵會理擊破之方得進路臺城陷會理歸鎮侯景遣前臨江太守董紹先以武帝手詔召會理其僚佐曰紹先書豈天子本意咸勸拒之會理用其典籤范子鸞計曰天子年尊受制賊虜今有手勅召我入朝臣子之心豈得違背且處江北功

業難成不若身赴京都圖之肘腋遂納紹先紹先入以
烏幡麾衆單馬遣之至都景以為司空兼尚書令雖在
寇手每思匡復與西鄉侯歡等潛布腹心要結壯士時
范陽祖皓斬董紹先據廣陵起義期以會理為內應皓
敗辭相連及侯景矯詔免會理官猶以白衣領尚書令
是冬景往晉熙都下虛弱會理復與柳敬禮及北兗州
司馬成欽謀之敬禮曰舉大事必有所資今無寸兵安
可以動會理曰湖熟有吾故舊三千餘人昨來相知剋

期響集計賊守兵不過千人若大兵外攻吾等內應直
取王偉事必有成縱景後歸無能為也敬禮曰善於時
百姓厭賊咸思用命建安侯賁以謀告王偉偉遂收會
理及其弟通理時有錢唐褚冕會理之舊亦囚於省問
事之所被考掠千計終無所言會理隔壁聞之遙曰褚
郎豈不為吾致此邪然勿言王偉害會理褚冕竟以不
服赦之會理弟通理字仲宣位太子洗馬封祈陽侯至
是亦遇害通理弟又理字季英生十旬而簡王薨至三

歲能言見內人分散涕泣相送問其故或曰此簡王宮人喪畢去耳又理便號泣悲不自勝諸宮人見之莫不哀感為之停者三人服闋見武帝升殿又悲不自勝帝為之收涕謂左右曰此兒大必為奇士大同八年封安樂縣侯又理慷慨慕功名每讀書見忠臣烈士未嘗不廢卷歎曰一生之內當無愧古人博覽多識有文才嘗祭孔文舉墓并為立碑製文甚美及侯景內寇又理聚容赴南兗州隨兄會理入援及城陷又隨會理還廣陵

因入齊為質乞師行二日會理被遣董紹先據廣陵遂
追獲之防嚴不得與兄相見乃偽請還都入辭母謂其
姊固安主曰兄若至願使善為計自勉勿顧以為念前
途亦思立功但未知天命如何耳至都以魏降人元貞
忠正可以託孤乃以玉柄扇贈之貞辭不受又理曰後
當見憶會祖皓起兵又理奔長蘆為景所害元貞始悟
其前言往收葬焉

廬陵威王續字世訢武帝第五子也天監八年封廬陵

王少英果旅力絕人馳射應發命中武帝歎曰此我之任城也中大通二年為都督雍州刺史寧蠻校尉大同元年遷江州刺史又為驃騎將軍開府儀同三司又為都督荊州刺史薨贈司空諡曰威始元帝母阮脩容得幸由丁貴嬪之力故元帝與簡文相得而與廬陵王少相狎長相謗元帝之臨荊州有宮人李桃兒者以才慧得進及還以李氏行時得營戶禁重續其狀以聞元帝泣對使訴於簡文簡文和之不得元帝猶懼送李氏還

荊州世所謂西歸內人者自是二王書問不通及續薨
元帝時為江州聞問入閣而躍屣為之破尋自江州復
為荊州荊州人迎於州境帝數而遣之吏民失望續多
聚馬仗蓄養矯雄耽色愛財極意收斂倉儲庫藏盈溢
臨終有啓遣中兵錄事參軍謝宣融送所上金銀器千
餘件武帝始知其富以為財多德寡因問宣融曰王金
盡於此乎宣融曰此之謂多安可加也夫王之過如日
月之蝕欲令陛下知之故終而不隱帝意乃解世子憑

以罪前誅死次子應嗣應不慧王薨至內庫閱珍物見金鉞問左右曰此可食不答曰不可應曰既不可食並特乞汝他皆此類

邵陵攜王綸字世調小字六真武帝第六子也少聰穎博學善屬文猶工尺牘天監十三年封邵陵郡王普通五年以西中郎將權攝南徐州事在州輕險躁虐喜怒不恒車服僭擬肆行非法遨遊市里雜於厮隸嘗問賣鮓者曰刺史何如對者言其躁虐綸怒令吞鮓以死自

是百姓惶駭道路以目嘗逢喪車奪孝子服而著之匍匐號叫畿帥懼罪密以聞帝始嚴責綸不能改於是遣代綸悖慢逾甚乃取一老公短瘦類帝者加以袞冕置之高坐朝以為君自陳無罪使就坐剔褫捶之於庭忽作新棺木貯司馬崔會意以輜車挽歌為送葬之法使嫗乘車悲號會意不堪輕騎還都以聞帝恐其奔逸以禁兵取之將於獄賜盡昭明太子流涕固諫得免官削爵土還第大通元年復封爵中大通四年為揚州刺史

綸素驕縱欲盛器服遣人就市賒買錦采絲布數百疋
擬與左右職局防閣為絳衫內人帳幔百姓並關閉邸
店不出臺續使少府市采經時不能得勅責府府丞何
智通具以聞因被責還第恒遣心腹馬容戴子高戴爪
李撤趙智英等於路尋目智通於白馬巷逢之以槊刺
之刃出於背智通以血書歷作邵陵字乃絕遂知之帝
懸錢百萬購賊有西州遊軍將宋鶴子條姓名以啓勅
遣舍人褚曇榮領齋仗五百人圍綸第於內人堆中禽

爪撤智英子高驍勇踰牆突圍遂免智通子敞之割炙
食之即載出新亭四面火炙之焦熟敞之車載錢設鹽
蒜雇百姓食撤一臠賞錢一千徒黨并母肉遂盡綸鎖
在第舍人褚曇粲并主帥領仗身守視免為庶人經三
旬乃脫鎖頃之復封爵後豫餞衡州刺史元慶和於坐
賦詩十二韻末云方同廣川國寂寞久無聲大為武帝
賞曰汝人才如此何慮無聲旬日間拜郢州刺史太清
二年位中衛將軍開府儀同三司侯景構逆加征討大

都督率衆討景將發帝誡曰侯景小豎頗習行陣未可
以一戰即殄當以歲月圖之綸發白下中江而浪起有
物蕩舟將覆識者尤異之及次鍾離景已度采石綸乃
晝夜兼道旋軍入赴濟江中流風起人馬溺者十一二
遂率西豐公大春新塗公大成等步騎三萬發京口將
軍趙伯超請從徑路直指鍾山出其不意綸從之衆軍
奄至賊徒大駭分為三道攻綸綸大破之翌日賊又來
攻日晚賊稍退南安侯駿以數十騎馳之賊回拒駿

部亂賊因逼大軍大軍潰綸至鍾山戰敗奔還京口軍
主霍雋見獲賊送於城下逼使云己禽邵陵王雋偽許
之乃曰王小失利政為糧盡還京口雋為託邏所獲非
軍敗也賊以刀背毆其髀雋色不變賊義而捨之雋中
書舍人靈超子也三年正月綸與東揚州刺史大連等
入援至驃騎洲進位司空臺城陷綸奔禹穴東土皆附
臨城公大連懼將害己乃圖之綸覺乃去至尋陽尋陽
王大心欲以州讓之不受大寶元年綸至郢州刺史南

平王恪讓州於綸綸復不受乃上綸為假黃鉞都督中外諸軍事綸於是置百官改聽事為正陽殿內外齋省悉題署焉而數有變怪祭城隍神將烹牛有赤蛇繞牛口出南浦施安幄帳無何風起飄沒於江於時元帝圍河東王譽於長沙既久譽請救於綸綸欲往救之為軍糧不繼遂止乃與元帝書言大敵猶彊天讐未雪豈可手足肱支自相屠害元帝復書陳譽有罪不可解圍之狀綸省書流涕曰天下之事一至於斯左右聞之莫不

掩泣於是大脩器甲將討侯景元帝聞其盛乃遣王僧
辯率舟師一萬以逼綸綸將劉龍武等降僧辯綸遂與
子躒等十餘人輕舟走武昌沙門法罄與綸有舊藏之
巖石之下時綸長史韋質司馬姜偉先在外聞綸敗馳
往迎之元帝復遣將徐文盛追攻之綸復收散卒屯於
齊昌郡將引魏兵共攻南陽侯景將任約襲綸綸敗走
定州刺史田龍祖迎綸綸懼為所執復歸齊昌行收兵
至汝南魏所署汝南城主李素孝者綸之故吏開城納

之綸乃復脩城池收集士卒將攻竟陵魏聞之遣大將楊忠儀同侯幾通攻破城執綸綸不為屈通乃臥大鼓使綸坐上殺之投於江岸經日色不變鳥獸莫敢近時飛雪飄零屍橫道路周回數步獨不沾灑舊主帥安陸人郝破敵斂之於襄陽葬之日黃雪紛糅惟冢壙所獨不下雪楊忠知而悔之使以太牢往祭殯焉百姓憐之為立祠廟岳陽王營遣迎喪葬於襄陽望楚山南贈太宰諡曰安後元帝議追加諡尚書左丞劉穀議諡法怠

政交外曰攜從之綸任情卓越輕財愛士不競人利府
無儲積聞有輒求既得即散士亦以此歸之初鎮京口
大造器甲既涉聲問投之於江及後出征戎備頗闕乃
歎曰吾昔造仗本備非常無事涉疑遂使零散今日事
難卒無所資初昭明之薨簡文入居監撫綸不謂德舉
而云時無豫章故以次立及廬陵之沒綸舐望滋甚於
是伏兵於莽用伺車駕而臺舍人張僧允知之其謀頗
泄又獻曲阿酒百器上以賜寺人飲之而斃上乃不自

安頗加衛士以警宮內於是傳者諸相疑阻而綸亦不懼武帝終不能有所廢黜卒至宗室爭競而敗國基為天下笑綸長子堅字長白大同元年以例封汝南侯亦善草隸性頗庸短嘗與所親書題云嗣王其人得書大駭執以諫堅堅曰前言戲耳人曰不願以此為戲也侯景圍城堅屯太陽門終日痛飲不撫軍政吏士有功未嘗申理疫癘所加亦不存卹士咸憤怒太清三年堅書佐董勛華白曇朗等以堅私室醞釀亟有烹宰不相霑

及忿恨夜遣賊登樓城遂陷堅遇害弟確字仲正少驍
勇有文才尤工楷隸公家碑碣皆使書之除祕書丞武
帝謂曰為汝能文所以特有此授大同二年封為正階
侯復徙封永安常在第中習騎射學兵法時人以為狂
左右或進諫確曰聽吾為國家破賊使汝知之鍾山之
役確所向披靡羣賊憚之確每臨陣對敵意甚詳贍帶
甲據鞍自朝及夕馳驟往還不以為勞諸將服其壯勇
軍敗賊使負袍不之知也確因隙自拔得達朱方及後

侯景乞盟憚確及趙威方在外慮為後患啓求召確入城詔乃召確為南中郎將廣州刺史確知此盟多貳城必淪沒欲先遣趙威方入確因南奔綸聞之逼確使入確猶不肯綸流涕謂曰汝欲反邪時臺使周石珍在坐確曰侯景雖云欲去而不解長圍以意而推其事可見今召我入未見益也石珍曰勅旨如此侯豈得辭確執意猶堅綸大怒謂趙伯超曰譙州卿為我斬之當齎首赴闕伯超揮刃眄曰我識君耳刀豈識君確流涕而出

遂入城及景背盟復圍城城陷時武帝方寢確排闥入
啓曰城已陷矣帝曰猶可一戰不對曰人心不可臣向
格戰不禁縋下僅得至此武帝歎曰自我得之自我失
之亦復何恨幸不累子孫乃使確為慰勞文謂曰爾速
去謂爾父無以二宮為念及出見景景愛其膂力恒令
在左右後從景仰見飛戴羣賊爭射不中確射之應弦
即落賊徒忌確咸勸景除之先是綸遣典籤密導確確
謂使者曰侯景政可一夫力致確不惜死欲手刃之卿

還啓家王勿以一子為念後與景獵鍾山同逐禽引弓
將射景弦斷不得發賊覺殺之

武陵王紀字世詢武帝第八子也少而寬和喜怒不形
於色勤學有文才天監十三年封武陵王尋授揚州刺
史中書詔成武帝加四句曰貞白儉素是其清也臨財
能讓是其廉也知法不犯是其慎也度事無留是其勤
也紀特為帝愛故先作牧揚州大同三年為都督益州
刺史以路遠固辭武帝素識乾象謂曰天下方亂唯益

州可免故以處汝汝其勉之紀獻欵既出復入帝曰汝嘗言我老我猶再見汝還益州也紀在蜀開建寧越窩貢獻方物十倍前人朝廷嘉其績加開府儀同三司初天監中震大陽城門字曰紹宗梁位唯武王解者以武陵王當之於是朝野屬意焉及侯景陷臺城上甲侯蕭韶西上至硤出武帝密勅加紀侍中假黃鉞都督益州諸軍事驃騎大將軍太尉承制大寶元年六月辛酉紀乃移告諸州征鎮遣世子圓照領二蜀精兵三萬受湘

東王繹節度繹命圓照且頓白帝未許東下十月甲辰
湘東王繹遣鮑檢報紀以武帝崩問十一月壬寅紀總
戎將發益鎮繹使胡智監至蜀以書止之曰蜀中斗絕
易動難安弟可鎮之吾自當滅賊又別紙云地擬孫劉
各安境界情深魯衛書信恒通二年四月乙丑紀乃僭
號於蜀改年曰天正暗與蕭棟同名識者尤之以為於
文天為二人正為一止言各一年而止也紀又立子圓
照為皇太子圓正為西陽王圓滿竟陵王圓普譙王圓

肅宜都王以巴西梓潼二郡太守永豐侯撫為征西大

將軍益州刺史封秦郡王司馬王僧畧直兵參軍徐怿

並固諫皆殺之僧畧僧辯弟怿從子也永豐侯撫歎

曰王不克矣夫善人國之基也今乃誅之不亡何待又

謂所親曰昔桓元年號大亨識者謂為二月了而元之

敗寔在仲春今年曰天正在文為一止其能久乎丁卯

元帝遣萬州刺史宋逵襲圓照於白帝圓照弟圓正時

為西陽太守召至鎖於省內初楊乾運求為黎州刺史

不得紀以為潼州刺史楊法深求為黎州刺史亦不從
以為沙州刺史二人皆憾不獲所請各遣使通西魏及
聞魏軍伐蜀紀遣其將譙淹回軍赴援魏將尉遲迴逼
涪水楊乾運以州降之迴即趨成都五月乙巳紀次於
陵軍容甚盛元帝命護軍將軍陸法和立二城於硤口
名七勝城鎖江以斷峽時陸納未平蜀軍復逼元帝甚
憂法和告急旬日相繼元帝乃拔任約於獄以為晉安
王司馬撤禁兵以配之并遣宣猛將軍劉綦共約西赴

六月紀築連城攻絕鐵鑠元帝復於獄拔謝答仁為步兵校尉配衆一旅上赴紀之將發也江水可揭前部不得行及登舟無雨而水長六尺劉孝勝喜曰殆天贊也將至峽有黑龍負舟其將帥咸謂天助及頓兵日久頻戰不利師老糧盡智力俱殫又魏人入劔閣成都虛弱憂懣不知所為先是元帝已平侯景執所俘馘頻遣報紀世子圓照鎮巴東留執不遣啓紀云侯景未平宜急征討已聞荆鎮為景所滅可疾下大軍紀謂為寔於是

仍率衆沿江急進於路方知侯景已平便有悔意召圓
照責之圓照曰侯景雖誅江陵未服宜速平蕩紀亦以
既居尊位宣言於衆敢諫者死蜀中將卒日夜思歸所
署江州刺史王開業進曰宜還救根本更思後圖諸將
僉以為然圓照劉孝勝獨言不可紀乃止既而聞王琳
將至潛遣將軍侯劼傍險出法和後臨水築壘禦琳及
法和元帝遣書使光州刺史鄭安中往喻意於紀許其
還蜀專制嶠方紀不從命報書如家人禮既而侯劼為

任約謝答仁所破又陸納平諸軍並西赴元帝乃與紀
書曰甚苦大智季月煩暑流金爍石聚蚊成雷封狐千
里以茲玉體辛苦行陣乃睠西顧我勞如何自獯醜憑
陵羯胡叛渙吾年為一日之長屬有平亂之功膺此樂
推事歸當璧儻遣使乎良所希也如曰不然於此投筆
友於兄弟分形共氣兄弟瘦無復相代之期讓棗推
梨長罷懽愉之日上林靜拱聞四鳥之哀鳴宣室披圖
嗟萬世之長逝心乎愛矣書不盡言大智紀別字也帝

又為詩曰回首望荆門驚浪且雷奔四鳥嗟長別三聲
悲夜猿圓正在獄中連句曰水長二江急雲生三峽昏
願赦淮南罪思報阜陵恩帝看詩而泣紀頻敗知不振
遣所署度支尚書樂奉業往江陵論和緝之計元帝知
紀必敗遂拒而不許於是兩岸十餘城俱降遊擊將軍
樊猛率所領至紀所紀在船中繞牀而走以金擲猛等
曰此顧卿送我一見七官卿必當富貴猛曰天子何由
可見殺足下此金何之猶不敢逼圍而守之陸法和馳

啓上密勅樊猛曰生還不成功也猛率甲士祝文簡張
天成拔刃升舟猶左右奔擲第三子圓滿馳來就父紀
首既落圓滿軀亦分法和收太子圓照兄弟三人問圓
照曰阿郎何以至此圓照曰失計願為公作奴法和叱
遣之圓照字明同中大通初為益州東齋郎宋寧宋興
二郡太守遠鎮諸王世子皆在建業質守帝特愛紀故
遣以副紀紀之構釁悉其謀也次第圓正先見鎖在江
陵及紀既以兵終元帝使謂曰西軍已敗汝父不知存

亡意欲使其自裁而圓正既奉此問便號哭盡哀以禍
難之興皆由圓照於是唯哭世子言不絕聲上謂圓正
聞問悲感必應自殺頻看不能死乃付廷尉獄及見圓
照曰阿兄何乃亂人骨肉使酷痛如此圓照更無所言
唯云計誤並命絕食於獄齧臂啖之十三日死天下聞
而悲之圓正字明允紀第二子也美風儀善談論寬和
好施愛接士人本封江安侯歷西陽太守有惠政既居
上流人附之者甚衆及侯景作逆圓正收兵衆且一萬

後遂跋扈中流不順王命及累破後復謀入蜀元帝將
圖之署為平南將軍及至弗見使南平嗣王恪等與飲
醉而囚之時紀稱梁王及紀敗死有司奏請絕屬籍元
帝許之賜姓饗饗氏紀最為武帝所愛武帝諸子罕登
公位唯紀以功業顯著先啓黃扉時邵陵王綸屢以罪
黜心每不平及聞紀為征西乃撫枕歎曰武陵有何功
業而位乃前我朝廷憤憤似不知人武帝聞之大怒曰
武陵有恤民拓境之勲汝有何績敢擬之邪太清初帝

思之使善畫者張僧繇至蜀圖其形以歸紀在蜀十七年南開寧州越嶲西通資陵吐谷渾內修耕桑鹽鐵之功外通商賈遠方之利故能殖其財用器甲殷積馬八千疋上足者置之內廐開寢殿以通之日落輒出步馬便騎射尤工舞稍九日講武躬領幢隊及聞國難謂僚佐曰七官文士豈能匡濟既東下黃金一斤為餅百餅為蓬至有百蓬銀五倍之其他錦罽繒采稱是每戰則懸金帛以示將士終不賞賜寧州刺史陳知祖請散金

銀募勇士不聽慟哭而去自是人各離心莫肯為用紀
頗學觀古善風角亦知不復能濟瞻望氣色歎吒天道
推牀聲聞於下有請事者以疾辭不見既死堙於沙洲
不封無襯元帝以劉孝勝付廷尉尋免之初紀將僭號
祇怪不一內寢栢殿柱繞節生花其莖四十有六霍靡
可愛狀似荷花識者曰王敦祇花非佳事也時蜀知星
人說紀曰官若東下當用申年太白出西從之為利申
歲發蜀酉年入荆不可失也發蜀之歲太白在西北及

明年則已東出矣紀第五子圓肅字明恭風度淹雅敏而好學紀僭號封宜都王除侍中自率兵下峽令蕭撫守成都以圓肅為之副及尉遲迥至圓肅與撫俱降魏授圓肅開府儀同三司侍中封安化縣公周明帝初進棘城郡公以歸款勲別賜食思君縣五百戶後拜咸陽郡守甚有政績尋改授太子少傅復出為豐州刺史尋進位上開府儀同大將軍歷司宗中大夫洛州刺史進位大將軍隋開皇初授貝州刺史以母老請歸養詔許

之卒於家年四十六有文集十卷又撰時人詩筆為文
海四十卷廣堪十卷淮海亂離志四卷行於世

簡文諸子

簡文二十子王宣后生哀太子大器南郡王大連陳淑
容生尋陽王大心左夫人生南海王大臨安陸王大春
謝夫人生瀏陽公大雅張夫人生新興王大莊包昭華
生西陽王大鈞范夫人生武寧王大威褚修華生建平
王大球陳夫人生義安王大昕朱夫人生綏建王大摯

其臨川王大款桂陽王大成汝南王大封樂良王大圜
並不知母氏潘美人生皇子大訓早亡無封其餘不知
不載

哀太子大器字仁宗簡文嫡長子也中大通三年封宣
城郡王太清二年十月侯景寇建業勅太子為臺內大
都督三年五月簡文即位六月癸酉立為皇太子大寶
二年八月侯景廢簡文將害太子時景黨稱景命召之
太子方講老子將下牀而刑人奄至太子顏色不變徐

曰久知此事嗟其晚耳刑者將以衣帶絞之太子曰此不能見殺乃指繫帳竿下繩命取絞之而絕時年二十八太子性寬和兼神用端凝在賊中每不屈意左右竊問其故答曰賊若未須見殺雖復陵傲呵叱終不敢言若見害時至雖一日百拜無益於死又曰官今憂迫而神貌怡然未喻此意答曰吾自度死必在賊前若諸叔外來平夷羯寇必前見殺然後就死若其遂開拓上流必先見殺後取富貴何能以無益之愁橫憂必死之命

乎景之西上攜太子同行及敗歸船往往相失太子所
乘船入攄陽浦舟中腹心並勸因此入北太子曰自國
家喪敗志不圖生主上蒙塵寧忍違離吾今若去乃是
叛父非謂避賊天下豈有無父之國便涕泗嗚咽命即
前進賊以太子有器度憚之恐為後患故先及禍承聖
元年四月追諡哀太子祔太廟陰室

尋陽王大心字仁恕簡文第二子也幼而聰明善屬文
中大通四年以皇孫封當陽縣公大同元年為都督郢

州刺史時年十三州事悉付行事大心雖不親州務發言每合於理衆皆敬服太清元年為雲麾將軍江州刺史貪冒財賄不能綏撫百姓二年侯景寇都城大心招集士卒與上流諸軍赴援宮闕三年臺城陷上甲侯蕭韶南奔宣密詔加散騎常侍進號平南將軍大寶元年封尋陽王初歷陽太守莊鐵以城降侯景既而又奉其母來奔大心以為鐵舊將厚為其禮軍旅之事悉以委之以為豫章內史景數遣軍西上寇抄大心輒令鐵擊

破之禽其將趙加婁賊不能進時鄱陽王範率衆棄合肥屯於柵口待援兵總集欲俱進大心聞之遣要範西上以湓城處之廩饋甚厚欲與戮力共除禍難會鐵據豫章反大心令中兵參軍韋約討之鐵敗乞降鄱陽世子嗣先與鐵善乃謂範曰昔與鐵遊處其人才畧從橫若降江州必不全其首領請援之乃遣將侯瑱救鐵夜破韋約等營大心大懼於是二蕃疊起景將任約畧地至盆城大心遣司馬韋質拒戰敗績時帳下猶有勇士

千餘人咸說曰既無糧儲難以守固若輕騎往建州以圖後舉策之上也其母陳淑容不從撫膺慟哭大心乃止遂與約和二年將遇害繞牀謂賊廂公王僧貴曰我以全州歸命何忍相苦乃見射而殞

臨川王大款字仁師簡文第三子也初封石城縣公位中書侍郎太清三年簡文即位封江夏郡王大寶元年奔江陵湘東王承制改封臨川王魏克江陵遇害

南海王大臨字仁宣簡文第四子也大同二年封寧國

縣公少而敏慧年十一遭左夫人憂哭泣毀瘠以孝聞
後入國學明經射策甲科拜中書侍郎遷給事黃門侍
郎十一年長兼侍中出為琅邪彭城二郡太守侯景亂
屯端門都督城南諸軍事大寶元年封南海郡王出為
都督東揚州刺史又除吳郡太守時張彪起義於會稽
吳人陸令公潁州庾孟卿等勸大臨投之大臨曰彪若
成功不藉我力如其撓敗以我說焉不可往也二年遇
害

南郡王大連字仁靖簡文第五子也少俊爽能屬文舉
止風流雅有巧思妙達音樂兼善丹青大同二年封臨
城縣公七年與南海王俱入國學並射策甲科皆拜中
書侍郎遷給事黃門侍郎轉侍中太清元年出為東揚
州刺史侯景入寇建業大連率衆四萬來赴及臺城沒
援軍散還東揚州會稽豐沃糧仗山積東人懲景苛虐
咸樂為用而大連恒沉湎於酒宋子仙攻之大連棄城
走追及於信安縣大連猶醉弗之覺於是三吳悉為賊

有大寶元年封南郡王賊遣將趙伯超劉神茂來攻大連專委部將留異異以城應賊大連棄走為賊所獲侯景以為江州刺史二年遇害

安陸王大春字仁經簡文第六子也少博涉書記善吹笙天性孝謹體貌瓌偉腰帶十圍大同六年封西豐縣侯拜中書侍郎後為寧遠將軍知石頭戍軍事侯景內寇大春奔京口隨邵陵王入援戰於鍾山軍敗肥大不能行為賊所獲大寶元年封安陸郡王出為東揚州刺

史二年遇害

桂陽王大成字仁和簡文第八子也初封新塗公太清三年簡文即位封山陽郡王大寶元年奔江陵湘東王承制改封桂陽王大成性甚亮麗兼便弓馬至江陵被甲夜出人謂為劫砍之遂失左髻魏克江陵遇害

汝南王大封字仁叡簡文第九子也初封臨汝公太清三年簡文即位封宜都郡王大寶元年奔江陵湘東王承制封汝南王魏克江陵入長安周封為晉陵縣公入

隋位開府儀同三司陳州刺史

瀏陽公大雅字仁風簡文第十二子也大同九年封瀏陽縣公少聰警美姿儀特為武帝所愛臺城陷大雅猶命左右格戰賊至漸衆乃自縊而下發憤感疾薨

新興王大莊字仁禮簡文第十三子也性躁動大同元年封高唐縣公大寶元年封新興郡王位南徐州刺史二年遇害

西陽王大鈞字仁輔簡文第十四子也性厚重不妄戲

弄年七歲武帝嘗問讀何書對曰學詩因令諷誦即誦
周南音韻清雅帝重之大寶元年封西陽郡王位丹陽
尹二年監揚州遇害

武寧王大威字仁容簡文第十五子也美風儀眉目如
畫大寶元年封武寧郡王二年為丹陽尹遇害

皇子大訓字仁德簡文第十六子也少而脚疾不能躡
履太清三年未封而亡年十歲

建平王大球字仁珽簡文第十七子也大寶元年封建

平郡王性明慧夙成初侯景圍臺城武帝素歸心釋教每發誓願恒云若有衆生應受諸苦請身代當時大球年甫七歲聞而驚謂母曰官家尚爾兒安敢辭乃六時禮佛亦云凡有衆生應獲苦報悉大球代受其早慧如此二年遇害

義安王大昕字仁朗簡文第十八子也年四歲母陳夫人卒便哀毀有若成人晨夕涕泣眼為之傷及武帝崩大昕奉慰簡文鳴噎不自勝左右莫不掩泣大寶元年

封義安郡王二年遇害

綏建王大摯字仁瑛簡文第十九子也幼雄壯有膽氣及臺城陷乃歎曰大丈夫會當滅虜屬奶媪驚掩其口曰勿妄言禍將及大摯笑曰禍至非由此大寶元年封二年遇害

樂良王大圜字仁顯簡文第二十子也幼而聰敏神情俊悟年四歲能誦三都賦及孝經論語七歲居母喪便有成人性大寶元年封樂良郡王丹陽尹簡文遇弒大

園潛遁獲免侯景平歸建業時喪亂之後無所依乃寓居善覺佛寺人有以告王僧辯僧辯乃給船餼得往江陵元帝見之甚悅賜以越衫胡帶改封晉熙郡王除琅瑯彭城二郡太守時大園兄汝南王大封等猶未通謁元帝性忌刻甚恨望之乃使大園召之大園即日曉諭兩兄相繼出謁元帝乃安之大園以世方多故恐讒慝生焉乃屏絕人事門客左右不過三兩人不妄遊狎兄弟之間止賤疏而已嘗以讀詩禮書易為事元帝嘗自

問五經要事數十條大園辭約指明應答無滯元帝甚
歎美之因謂曰昔河間好學爾既有之臨淄好文爾又
兼之然有東平為善彌高前載吾重之愛之爾當效焉
及于謹軍至元帝乃遣大封充使請和大園副焉其寔
質也出至軍所信宿元帝遂降魏恭帝二年大園至長
安相國宇文泰以客禮待之周保定二年大園受封始
寧縣公尋加車騎大將軍儀同三司賜田宅奴婢俄而
開麟趾殿召集學士大園豫焉初梁武帝集四十卷簡

文集九十卷各止一本江陵平後並藏祕閣至是大園
於麟趾見之乃手寫二集一年並畢識者稱歎之建德
四年除滕王逌友逌嘗問大園曰吾聞湘東王作梁史
有之乎餘傳乃可抑揚帝紀奚若隱則非寔記則攘羊
對曰言者之妄也如使有之亦不足怪昔漢明為世祖
紀章帝為顯宗紀殷鑒不遠足為成例且君子之過如
日月之蝕彰於四海安得而隱之如有不彰亦安得而
不隱蓋子為父隱直在其中諱國之惡抑又禮也逌乃

大服其後大軍東討攻拔晉州或問大圜曰師遂克否
對曰高歡昔以晉州肇基偽迹今本既拔矣能無亡乎
所謂君以此始者必以此終居數月齊氏果滅聞者以
為知言隋開皇初拜內史侍郎出為西河郡守卒大圜
好學務於著述撰梁舊事三十卷寓記三卷士喪儀注
五卷要訣二卷并文集二十卷

元帝諸子

元帝諸子徐妃生忠烈世子方等王貴嬪生貞惠世子

方諸始安王方略袁貴人生愍懷太子方矩夏貴妃生敬皇帝自餘不顯

忠烈世子方等字寔相元帝長子也少聰敏有俊才善騎射尤長巧思性愛林泉特好散逸嘗著論曰人生處世如白駒過隙耳一壺之酒足以養性一簞之食足以怡形生在蓬蒿死葬溝壑瓦棺石槨何以異茲吾嘗夢為魚因化為鳥方其夢也何樂如之及其覺也何憂類斯良由吾之不及魚鳥者遠矣故魚鳥飛浮任其志性

吾之進退常在掌握舉手懼觸搖足恐墜若使吾終得與魚鳥同遊則去人間如脫屣耳初徐妃以嫉妬失寵方諸母王氏以治容倖嬖及王夫人終元帝歸咎徐妃方等意不自安元帝聞之又惡方等方等益懼故述此論以申其志時武帝年高欲見諸王長子元帝遣方等方等欣然升舟冀免憂辱行至繇水遇侯景亂元帝召之方等啓曰昔申生不愛其死方等豈顧其生元帝省書歎息知無還意乃配步騎一萬使援臺城賊每來攻

方等必身當矢石城陷方等歸荊州收集士馬甚得衆和元帝始歎其能方等又勸修築城柵以備不虞既成樓雉相望周回七十餘里元帝觀之甚悅入謂徐妃曰若更有一子如此吾復何憂徐妃不答垂泣而退元帝忿之因疏其穢行勝於大閤方等入見益以自危時河東王為湘州刺史不受令方等求征之元帝謂曰汝有水厄深宜慎之拜為都督令南討方等臨行謂所親曰吾此段出征必死無二死而獲所吾豈愛生及至麻溪

軍敗溺死求屍不得元帝聞之心喜不以為戚後追思其才贈侍中中軍將軍揚州刺史諡忠壯世子命招魂以葬之方等注范曄後漢書未就所撰三十國春秋及篤靜子行於世元帝即位改諡武烈世子封子莊為永嘉王及魏克江陵莊年甫七歲為人家所匿後王琳迎送建業及敬帝立出質於齊敬帝太平二年陳武帝將受禪王琳請莊於齊以主梁嗣自湓城濟江二月即帝位於郢州年號天啓置百官王琳總其軍國明年莊為

陳人所敗其御史中丞劉仲威奉以奔壽陽遂入齊齊武平元年授特進開府儀同三司封梁王齊朝許以興復未果而齊亡莊在鄴飲氣而卒

貞惠世子方諸字明智元帝第二子也幼聰警博學明老易善談元風采清越特為元帝所愛母王氏又有寵及方等敗後元帝謂曰不有所廢其何以興勿以汝兄為念因拜中撫軍將軍以自副又出為郢州刺史鎮江夏以鮑泉為行事時元帝遣徐文盛與侯景將任約相

持方諸年十五童心未革恃文盛在近不恤軍政日與
鮑泉捕酒為樂侯景知之乃遣其將宋子仙從間道襲
之百姓奔告方諸與鮑泉皆不信曰文盛大軍在下虜
安得來始命閉門賊已入城方諸方踞泉腹以五色眊
辯其鬚子仙執方諸以歸王僧辯軍至蔡洲景遂害之
元帝追諡貞惠世子

愍懷太子方矩字德規元帝第四子也少勤學美容止
初封南安侯太清初累遷侍中中衛將軍元帝承制拜

王太子改名元良承聖元年十一月丙子立為皇太子
及升儲位昵狎羣小多有過失元帝有廢立計未及行
而江陵喪亡遇害太子聰穎凶暴猜忍俱有元帝風敬
帝承制追諡愍懷太子

始安王方略元帝第十子貞惠世子母弟也母王氏王
琳之次姊元帝即位拜貴嬪次妹又為良人並蒙寵幸
方略益鍾愛侯景亂元帝結好西魏方略年數歲遣入
關至長安即得還贈遺甚厚江陵喪亡遇害貴嬪良人

並更誕子未出閤無封失名

陳

永脩侯擬字公正高祖之疎屬也少孤貧性質直彊記
高祖南征交趾擬從焉梁紹泰二年除員外散騎常侍
明威將軍以雍州刺史資監南徐州事高祖踐阼廣封
宗室詔曰維城宗子實固有周磐石懿親用隆大漢故
會盟則異姓為後啓土則非劉勿王所以糾合枝幹廣
殖藩屏前王懋典列代常規從子持節員外散騎常侍

明威將軍雍州刺史監南徐州擬持節通直散騎侍郎
正威將軍北徐州刺史褒從子晃晃從孫假節員外郎
散騎常侍明威將軍諡假節信威將軍北徐州刺史吉
陽縣開國侯諡假節通直散騎侍郎信武將軍祔假節
散騎侍郎雄信將軍青州刺史詳正威將軍通直散騎
侍郎慧紀從孫敬雅敬泰並枝戚密近劬勞王室宜裂
河山以光利建擬可永修縣開國侯褒鍾陵縣開國侯
晃建城縣開國侯晃上饒縣開國侯諡慶化縣開國侯

誼仍前封柘豫章縣開國侯詳遂興縣開國侯慧紀宜
黃縣開國侯敬雅寧都縣開國侯敬泰平固縣開國侯
各五百戶文帝嗣位擬除丹陽尹常侍如故坐事又以
白衣知郡尋復本職天嘉元年卒時年五十八贈領軍
將軍諡曰定二年配享高祖廟庭子黨嗣

遂興侯詳字文幾少出家為沙門善書記談論清雅高
祖討侯景召令還俗配以兵馬從定建業永定二年封
遂興縣侯天嘉三年累遷吳州刺史五年討周迪戰敗

死之以所統失律無贈諡子正理嗣

宜黃侯慧紀字元方高祖之從孫也涉獵書史負材任
氣從高祖平侯景及帝踐阼封宜黃縣侯除黃門侍郎
大建十年吳明徹北侵敗績以慧紀為緣江都督兗州
刺史至德二年為都督荊州刺史及梁安平王蕭巖晉
熙王蕭瑒等詣慧紀請降慧紀以兵迎之以應接功位
開府儀同三司禎明三年隋師濟江慧紀率將士三萬
人船艦千餘乘沿江而下欲趣臺城遣南康太守呂肅

將兵據巫峽以五條鐵鎖橫江肅竭其私財以充軍用
隋將楊素奮兵擊之四十餘戰爭馬鞍山及磨刀澗守
險隋軍士死者五千餘人陳人盡取其鼻以求功賞既
而隋軍屢捷獲陳之士三縱之肅乃遁保延洲別帥廖
世寵領大舫詐降欲燒隋艦更決死一戰於是有五黃
龍備衆色各長十餘丈驤首連接順流而東風浪大起
雲霧晦冥陳人震駭不覺火自焚隋軍乘高艦張大弩
以射之陳軍大敗風浪應時頓息肅收餘衆東走慧紀

時至漢口為隋秦王俊所拒不得進聞肅敗盡燒公安之儲引兵東下因推湘州刺史晉熙王叔文為盟主水軍都督周羅暉與郢州刺史荀法尚守江夏及建業平隋晉王廣遣一使以慧紀子正業來喻又使樊毅喻羅暉其上流域戍悉解甲於是慧紀及巴州刺史畢寶並慟哭俱降慧紀入隋依例授儀同三司卒子正平頗有文學

衡陽獻王昌字敬業高祖第六子也梁太清末高祖南

征李賁命昌與宣后隨沈恪還吳興及高祖東討侯景
昌與宣后文帝在吳興並為景所囚景平拜長城國世
子吳興太守時年十六昌容貌偉麗神情秀朗雅性聰
辨明習政事高祖遣陳郡謝哲濟陽蔡景歷輔昌臨郡
又遣吳郡杜之偉授昌以經書昌讀書一覽便誦明於
經義剖析如流尋與宣帝俱往荊州梁元帝除員外散
騎常侍荊州陷又與宣帝俱遷關右西魏以高祖故甚
禮之高祖即位頻遣使請周人許之而未遣及高祖崩

乃遣之是時王琳梗於中流昌未得還居于安陸王琳
平後天嘉元年二月昌發自安陸由魯山濟江而巴陵
王蕭洸等率百僚上表請以昌為湘州牧封衡陽郡王
詔曰可三月甲戌入境詔令主書舍人緣道迎接丙子
濟江於中流殞之使以溺告四月庚寅喪柩至都上親
臨哭乃下詔贈假黃鉞都督中外諸軍事太宰揚州牧
葬送之儀一依漢東平憲王齊豫章文獻王故事諡曰
獻無子文帝以第七皇子伯信嗣伯信字孚之位西衡

州刺史及隋師濟江與臨汝侯方慶並為東衡州刺史
王勇所害

南康愍王曇朗高祖母弟忠壯王休先之子也休先少
倜儻有大志梁簡文之在東宮深被知遇為文德主帥
頃之卒敬帝即位追贈南徐州刺史封武康縣公高祖
受禪贈司徒封南康郡王諡曰忠壯曇朗少孤尤為高
祖所愛有膽力善綏御侯景平後起家著作郎高祖誅
王僧辯留曇朗鎮京口知留府事紹泰元年除中書侍

郎監南徐州二年齊兵攻逼建業時根本孤危高祖請和遣曇朗質於齊既而齊人背約遣蕭軌等隨徐嗣徽度江高祖大破之虜蕭軌東方老等誅之齊人亦害曇朗于晉陽時陳與齊絕弗之知高祖踐阼猶以曇朗襲封南康郡王奉忠壯王祀天嘉二年齊人結好始知其亡文帝詔贈開府儀同三司南徐州刺史諡曰愍乃遣兼中郎令隨聘使江德藻迎曇朗喪柩三年春至都初曇朗未質於齊生子方泰方慶及將適齊以二妾自隨

在北亦生二子方華方廣亦同得還方泰少麤獷與諸
惡少年羣聚游逸無度文帝以南康王故特寬宥之天
嘉二年以為南康王世子及聞曇朗薨於是襲爵南康
王大建四年為都督廣州刺史為政殘暴為有司奏免
六年授豫章內史在郡不修政事秩滿之際屢放部曲
為劫又縱火延燒邑居因行暴掠驅錄富民徵求財賄
代至又淹留不還至都以為宗正卿未拜為御史中丞
宗元饒所劾免官以王還第十一年起為寧遠將軍直

殿省尋加散騎常侍其年八月宣帝幸大壯觀因大閱
武命都督任忠領步騎十萬陣於元武湖都督陳景領
樓艦五百出於瓜步江上登元武門宴羣臣以觀之因
幸樂游苑設絲竹會仍重幸大壯觀集衆軍振旅而還
時方泰當從啓稱所生母疾不行因與亡命楊鍾期等
二十人微行往人間淫淳于岑妻為州長流所錄又率
人仗抗拒傷損禁司為有司所奏上大怒下方泰獄於
是兼御史中丞徐君敷奏請解方泰所居官下宗正削

爵土上可其奏禎明初為侍中陳亡與後主俱入長安

隋大業中為掖縣令方慶少清警涉獵書傳及長有幹
略天嘉中封臨汝縣侯至德二年累遷智武將軍武州
刺史初廣州刺史馬靖久居嶺表大得人心士馬殷盛
朝廷疑之以方慶為廣州刺史以兵襲靖靖誅進號宣
毅將軍方慶性清謹甚得人和禎明三年隋師濟江都
督東衡州刺史王勇徵兵於方慶欲與赴援臺城時隋
行軍總管韋洸帥兵度嶺宣隋文帝勅云若嶺南平定

留勇與豐州刺史鄭萬頃且依舊職方慶聞之恐勇賣
已且欲觀變乃不從勇使高州刺史戴智烈斬方慶於
廣州而收其兵鄭萬頃滎陽人梁司州刺史紹叔之始
族子也父旻梁末入魏萬頃通達有材幹周武帝時為
司城大夫出為溫州刺史至德中與司馬消難奔陳拜
散騎常侍昭武將軍豐州刺史在州甚有惠政吏民表
請立碑詔許焉初萬頃在周甚被隋文帝知遇及隋文
帝踐阼常思還北及王勇殺方慶萬頃乃率州兵拒勇

降隋隋授上儀同尋卒

文帝諸子

文帝十三男沈皇后生廢帝始興王伯茂嚴淑媛生都陽王伯山晉安王伯恭潘容華生新安王伯固劉昭華生衡陽王伯信王充華生廬陵王伯仁張修容生江夏王伯義韓修華生武陵王伯禮江貴妃生永陽王伯智孔貴妃生桂陽王伯謀二男早卒無名伯信出繼衡陽王昌

始興王伯茂字鬱之文帝第二子也初高祖兄始興昭烈王道談仕梁為直閣將軍侯景之亂領弩手二千援臺城中流矢卒紹泰二年贈南兗州刺史封義興郡公諡曰昭烈高祖受禪重贈太傅改封始興郡王道談生文帝及宣帝宣帝以梁承聖末遷于關中至是高祖遙以宣帝襲封始興嗣王以奉昭烈王祀及高祖崩文帝入纂帝位時宣帝在周未還文帝以本宗乏饗徙封宣帝為安成王伯茂為始興王以奉昭烈王祀賜天下為

父後者爵一級舊制諸王受封未加戎號者不置佐史於是尚書八座奏加伯茂寧遠將軍置佐史除揚州刺史伯茂性聰敏好學謙恭下士又以太子母弟故文帝深愛重之是時征北軍人於丹徒盜發晉郝曇墓大獲晉右將軍王羲之書及諸名賢遺跡事覺其書並沒縣官藏于秘府文帝以伯茂好古多以賜之由是伯茂大工草隸甚得右軍法遷東揚州刺史鎮東將軍開府儀同三司廢帝時伯茂在都劉師知等矯詔出宣帝伯茂

勸成之師知等誅後宣帝恐伯茂扇動朝廷乃進號中
衛將軍令入居禁中專與廢帝游處時四海之望咸歸
宣帝伯茂深不平日加憤怨肆出惡言宣帝以其無能
不以為意及建安人蔣裕與韓子高等謀反伯茂陰豫
其事光大二年皇太后令黜廢帝為臨海王其日入下
令降伯茂為溫麻侯時六門之外有別館以為諸王冠
昏之所名為昏第至是命伯茂出居之宣帝遣盜殞之
于車中時年十八

鄱陽王伯山字靜之文帝第三子也偉容儀舉止閑雅
喜愠不形於色高祖時天下草創諸王受封儀注多闕
及伯山受封文帝欲重其事天嘉元年七月丙辰尚書
八座奏封鄱陽郡王乃遣度支尚書蕭睿持節兼太宰
告于太廟又遣五兵尚書王質持節兼太宰告于太社
其年十月上臨軒策命策訖令王公以下並宴於王第
六年為緣江都督平北將軍南徐州刺史宣帝輔政不
欲令伯山處邊光大元年徙為東揚州刺史累遷征南

將軍護軍將軍加開府儀同三司給鼓吹并扶伯山於諸王最長後主深敬重之每朝廷有冠昏饗宴恒使為主及遭所生母憂居喪以孝聞起為鎮衛將軍將遷太尉既有命矣未及發詔禎明三年薨尋屬陳亡遂無贈諡長子君範未襲爵而隋師至時宗室諸王侯在都者百餘人後主恐其為變乃並召入屯朝堂使豫章王叔英總督之又陰為之備六軍敗績相率出降因從後主入長安隋文帝並配隴右及河西諸州各給田業以處

之大業二年隋煬帝以後主第六女嫺為貴人絕愛幸
因召陳氏子弟盡還京師隨才叙用由是並為守宰徧
於天下君範位溫令

新安王伯固字牢之文帝第五子也生而龜背目通精
揚白形狀眇小而俊辯善言論天嘉六年立為新安郡
王大建七年累遷都督南徐州刺史伯固性嗜酒不好
積聚所得俸祿用度無節酣醉以後多所乞丐於諸王
中最為貧窶宣帝每矜之特加賞賜性輕率好行鞭撻

在州不知政事日出田獵或乘眠輿至於草間輒呼人
從游動至旬日所捕麋鹿多使生致宣帝頗知之遣使
者責讓者數矣十年為國子祭酒頗知元理而墮業無
所通至於摘句問難徃徃有奇意為政苛嚴國學有墮
游不脩習者必重加撻楚生徒懼焉由是學業頗進十
三年為都督揚州刺史後主初在東宮與伯固甚親狎
伯固又善譎諛宣帝每宴集多引之叔陵在江州心害
其寵陰求瑕疵將中以法及叔陵入朝伯固懼罪諂求

其意乃共訕毀朝賢歷詆文武雖耆年高位皆面折無所畏懼伯固性好射雉叔陵又好開發冢墓出游田野必與偕行於是情好大協遂謀不軌伯固侍禁中每有密語必報叔陵及叔陵奔東府遣使告之伯固單馬馳赴及事不捷便欲走會四門已閉不得出因趣白楊道臺遣馬容等至為亂兵所殺尸於昌館門時年二十八詔特許以庶人禮葬子及所生王氏並特宥為庶人國除

晉安王伯恭字肅之文帝第六子天嘉六年封尋為吳郡太守時年十餘歲便留心政事官曹緝理厯位尚書左僕射後為中衛將軍右光祿大夫陳亡入長安大業初為成州刺史太常少卿

廬陵王伯仁字壽之文帝第八子天嘉六年立為侍中國子祭酒領太子左庶子陳亡卒於長安

江夏王伯義字堅之文帝第九子也天嘉六年封位金紫光祿大夫陳亡遷于瓜州道卒

武陵王伯禮字用之文帝第十子天嘉六年立大建初
為吳興太守在郡恣行暴掠後為有司所劾十一年被
代徵還遂遷延不發為御史中丞徐君整所劾免陳亡
入長安大業中為臨洮太守

永陽王伯智字策之文帝第十二子少敦厚有器局博
涉經史大建初立累遷尚書左僕射後為特進陳亡入
長安大業中為國子司業

桂陽王伯謀字深之文帝第十三子大建中立位散騎

常侍薨子鄴大業中為番禾令

宣帝諸子

宣帝四十二男柳皇后生後主彭貴人生始興王叔陵
曹淑華生豫章王叔英何淑儀生長沙王叔堅宜都王
叔明魏昭華生建安王叔卿錢貴妃生河東王叔獻劉
昭儀生新蔡王叔齊袁昭容生晉熙王叔文義陽王叔
達新會王叔坦王姬生淮南王叔彪巴山王叔雄吳姬
生始興王叔重徐姬生尋陽王叔儼淳于姬生岳陽王

叔慎王修華生武昌王叔虞韋修容生湘東王叔平施
姬生臨賀王叔敖沅陵王叔興曾姬生陽山王叔宣楊
姬生西陽王叔穆申婕妤生南安王叔儉南郡王叔澄
岳山王叔韶太原王叔匡袁姬生新興王叔純吳姬生
巴東王叔謨劉姬生臨海王叔顯秦姬生新寧王叔隆
新昌王叔榮其皇子叔叡叔忠叔泓叔毅叔訓叔武叔
處叔封八人並未及封三子早卒無名

始興王叔陵字子嵩宣帝第二子也梁承聖中生於江

陵魏克江陵宣帝遷關右叔陵留穰城宣帝之還以後
主及叔陵為質天嘉三年隨後主還朝封康樂縣侯叔
陵少機辯徇聲名彊梁無所摧屈大建元年封始興王
奉昭烈王祀位都督江州刺史時年十六政自己出僚
佐莫豫焉性嚴刻部下懾憚諸公子姪及罷縣令長皆
逼令事己豫章內史錢法成詣府進謁即配其子季卿
將領馬仗季卿慙耻不時至叔陵大怒侵辱法成法成
憤怨自縊而死州縣非其部內亦徵攝案之朝貴及下

吏有乖忤者輒誣奏其罪陷以重辟四年遷都督湘州
刺史諸州鎮聞其至皆震怖股慄叔陵日益橫征伐夷
獠所得皆入己絲毫不以賞賜徵求役使無有紀極夜
常不卧執燭達曉呼召賓客說人間細事戲謔無所不
為性不飲酒唯多置餽餼晝夜食噉而已自旦至中方
始寢寐曹局文案非呼不得輒白咎罪者皆繫獄動數
年不省視瀟湘以南皆通為左右廛里殆無遺者其中
脫有逃竄輒殺其妻子州縣無敢上言宣帝弗之知九

年除都督揚州刺史十年至都加扶給油幢車叔陵居
東府事務多關涉省閤執事之司承意順旨即諷上進
用之微致違忤必致大罪重者至殊死道路籍籍皆言
其有非常志叔陵修飾虛名每入朝常於車中馬上執
卷讀書高聲長誦陽陽自若歸坐齋中或自執斧斤為
沐猴百戲又好游冢墓間遇有塋表姓名可知者輒命
左右發掘取其石誌古器并骸骨肘脛持為翫弄藏之
府庫人間少妻處女微有色貌者並即逼納十一年丁

所生母彭氏憂去職頃之起為本職晉世王公貴人多
葬梅嶺及彭氏卒叔陵啓求梅嶺葬之乃發故太傅謝
安舊墓棄去安柩以葬其母初喪日偽為哀毀自稱刺
血寫涅槃經未及十旬乃日進甘膳又私召左右妻女
與之姦合所作尤不軌浸淫上聞宣帝責御史中丞王
政以不舉奏免政官又黜其典籤親事仍加鞭箠宣帝
素愛叔陵不繩以法但責讓而已服闋又為侍中中軍
大將軍及宣帝不豫後主諸王並入侍疾叔陵陰有異

志命典藥吏礪切藥刀及倉卒之際又命左右取劍左
右不悟乃取朝服所佩木劍以進叔陵怒及翌日小斂
後主哀頓俯伏叔陵以剗藥刀砍後主中項太后馳來
救焉叔陵又砍太后數下後主乳媼樂安君吳氏時在
太后側自後掣肘後主因得起叔陵仍持後主衣後主
自奮得免長沙王叔堅以手搯叔陵奪去其刀仍牽就
柱以其褶袖縛之棄池水中將殺之間後主曰即盡之
為待也時吳媼已扶後主避賊叔堅求後主所在將受

命叔陵多力因奮得脫突出雲龍門馳車還東府呼其
甲士斷青溪橋道放東城因以充戰士又遣人往新林
追所部兵馬仍自披甲著白帽登城西門招募百姓散
金銀以賞賜外召諸王將帥莫有應者唯新安王伯固
聞而赴之叔陵聚兵僅得千人欲據城保守時衆軍並
緣江防守臺內空虛叔堅白太后使太子舍人司馬申
急召右衛將軍蕭摩訶將兵至西府西門叔陵事急遣
記室韋諒送鼓吹與摩訶謂曰事捷以公為台鼎摩訶

給報曰須王心脅節將自來方敢從命叔陵即遣戴湜
譚騏驎二人詣摩訶摩訶執以送臺斬於閣道下持其
首徇東城仍懸於朱雀門叔陵自知不濟遂入沉其妃
張氏及寵妾七人于井中叔陵有部下兵先在新林於
是率人馬數百自小航度欲趣新林以舟艦入北行至
白楊路為臺軍所邀伯固見兵至旋避入巷叔陵拔刀
追之伯固復還叔陵部下多棄甲潰散摩訶馬容陳智
深迎刺叔陵閭豎王飛擒砍之數十下馬容陳仲華就

斬首送臺自寅至己乃定尚書八座奏請依宋世故事
流尸江中汚瀦其室并毀其所生彭氏墳廟還謝氏之
塋後主從所奏叔陵諸子即日並賜死

豫章王叔英字子烈宣帝第三子也寬厚仁愛大建元
年封後位司空隋大業中位涪陵太守卒

長沙王叔堅字子成宣帝第四子也母本吳中酒家婢
相者言當生貴子宣帝微時因飲通焉生叔堅及貴召
拜淑儀叔堅少而嚴整又頗使酒兄弟憚之好術數卜

笙風角鎔金琢玉並究其妙初封豐城侯大建元年封
長沙郡王累遷丹陽尹初叔堅與始興王叔陵並招聚
賓客各爭權寵甚不平每朝會鹵簿不肯為先後必分
道而趣左右或爭道而鬪至有死者及宣帝不豫叔堅
與叔陵並從後主侍疾叔陵陰有異志叔堅疑之微伺
其所為及行逆賴叔堅以免以功進驃騎將軍開府儀
同三司揚州刺史尋遷司空將軍刺史如故時後主患
創不能視事政無大小悉決於叔堅權傾朝廷後主由

是疎忌之孔範管斌施文慶等並東宮舊臣日夕陰持其短至德元年乃詔令即本號同三司之儀出為江州刺史未發尋以為司空寔欲奪其權又陰令人造其厭魅刻木為偶人衣以道士服施機關能跪拜晝夜於星月下醮之祝詛於上又令人上書告其事案驗令寔後主召叔堅囚于西曹將黜之令近侍宣敕數之叔堅自陳為佞人所構死日慙見叔陵後主感其前功乃赦之但免所居官以王還第後位中軍大將軍開府儀同三

司荊州刺史秩滿還都陳亡入隋遷于瓜州叔堅素貴不知家人生產至是與妃沈氏酣酒不以耕種為事大業中為遂寧郡守卒

建安王叔卿字子弼宣帝第五子也性質直有材氣容貌甚偉大建四年立位中書監陳亡入隋大業中為都官郎上黨通守

宜都王叔明字子昭宣帝第六子也儀容美麗舉止和柔狀似婦人大建五年立位侍中陳亡入隋大業中為

鴻臚少卿

河東王叔獻字子恭宣帝第九子也性恭謹聰敏好學
大建五年立位南徐州刺史薨贈司空諡康簡子孝寬
嗣大業中為汶城令

新蔡王叔齊字子肅宣帝第十一子也風采明贍博涉
經史善屬文大建七年立位侍中陳亡入隋大業中為
尚書主客郎

晉熙王叔文字子才宣帝第十二子也性輕險好虛譽

頗涉書史大建七年立位都督湘州刺史徵為侍中未
還而隋軍濟江隋秦王至漢口時叔文自湘州還朝至
巴州乃率巴州刺史畢寶等請降致書於秦王王遣使
往巴州迎勞叔文叔文與畢寶荊州刺史陳慧紀及文
武將吏赴漢口秦王并厚待之及至京隋文帝坐于廣
陽門觀叔文從後主至朝堂文帝使內史令李德林宣
旨責其君臣不能相弼以致喪亡後主與其羣臣並愧
懼拜伏莫能仰視叔文獨欣然有自得志後上表陳在

巴州先送欵望異常例文帝嫌其不忠而方懷來江表
遂授開府宜州刺史

淮南王叔彪字子華宣帝第十三子也少聰慧善屬文
大建八年立位侍中入隋卒于長安

始興王叔重字子厚宣帝第十四子也性質朴無伎藝
宣帝崩始興王叔陵為逆誅其年立叔重為始興王以
奉昭烈王後位江州刺史隋大業中為太府少卿

尋陽王叔儼字子思宣帝第十五子也性凝重舉止方

正後主即位立位侍中入隋卒

岳陽王叔慎字子敬宣帝第十六子也少聰敏十歲能屬文大建十四年立至德中為丹陽尹時後主尤愛文章叔慎與衡陽王伯信新蔡王叔齊等日夕陪侍賦詩恒被嗟賞禎明元年出為湘州刺史加都督及隋師濟江清河公楊素兵下荊州遣將龐暉略地至湘州州內將士剋日請降叔慎置酒會文武酒酣歎曰君臣之義盡於此乎長史謝基伏而流涕湘州助防遂興侯正理

在坐起曰主辱臣死諸君獨非陳國臣乎縱其無成猶見臣節青門之外有死不能今日後應者斬衆咸許諾乃刑牲結盟遣人詐奉降書於龐暉叔慎伏甲待之暉入伏兵發縛暉等以徇皆斬之叔慎招士衆數日中兵至五千人隋遣內陽公薛胄為湘州刺史聞龐暉死乃益請兵隋又遣行軍總管劉仁恩救之未至薛胄禽叔慎秦王斬之漢口

義陽王叔達字子聰宣帝第十七子也大建十四年立

位丹陽尹入隋大業中為內史舍人絳郡通守武德中
位侍中封江國公歷禮部尚書卒

巴山王叔雄字子猛宣帝第十八子也大建十四年立
入隋卒于長安

武昌王叔虞字子安宣帝第十九子也大建十四年立
入隋大業中為高苑令

湘東王叔平字子康宣帝第二十子也至德元年立入
隋大業中為胡蘇令

臨賀王叔敖字子仁宣帝第二十一子也至德元年立
入隋大業中位儀同三司

陽山王叔宣字子通宣帝第二十二子也至德元年立
入隋大業中為涇城令

西陽王叔穆字子和宣帝第二十三子也至德元年立
入隋卒于長安

南安王叔儉字子約宣帝第二十四子也至德元年立
入隋卒于長安

南郡王叔澄字子泉宣帝第二十五子也至德元年立
入隋大業中為靈武令

沅陵王叔興字子推宣帝第二十六子也至德元年立
入隋大業中為給事郎

岳山王叔韶字子欽宣帝第二十七子也至德元年立
位丹陽尹入隋卒于長安

新興王叔純字子洪宣帝第二十八子也至德元年立
入隋大業中為河北令

巴東王叔謨字子軌宣帝第二十九子也至德四年立
入隋大業中為汧陽令

臨海王叔顯字子亮宣帝第三十子也至德四年立入
隋大業中為鵲觚令

新會王叔坦字子開宣帝第三十一子也至德四年立
入隋大業中為涉縣令

新寧王叔隆字子遠宣帝第三十二子也至德四年立
入隋卒于長安

新昌王叔榮字子徹宣帝第三十三子也禎明三年立
入隋大業中為內黃令

太原王叔匡字子佐宣帝第三十四子也禎明三年立
入隋大業中為壽光令

後主諸子

後主二十二男張貴妃生皇太子深會稽王莊孫姬生
吳興王允高昭儀生南平王嶷呂淑媛生永嘉王彥邵
陵王琑龔貴嬪生南海王虔錢塘王恬張淑華生信義

王祗徐淑儀生東陽王恠孔貴人生吳郡王藩其皇子
總觀明綱統沖洽縉綽威辨十一人並未及封

皇太子深字承源後主第四子也少聰慧有志操容止
儼然雖左右近侍未嘗見其喜愠以母張貴妃故特為
後主所愛至德元年封始安王位揚州刺史禎明二年
皇太子允廢後主乃立深為皇太子及隋師濟江隋將
韓擒虎自南掖門入百僚逃散深時年十餘歲閉閣而
坐舍人孔伯魚侍焉隋師排閣而入深使宣令勞之曰

軍旅在道不乃勞也軍人咸致敬焉隋大業中為枹罕太守武德初為祕書丞卒官

吳興王允字承業後主長子也大建五年二月生於東宮母孫姬因產卒沈皇后哀而養之以為己子後主年長未有嗣宣帝命以為嫡孫詔為父後者賜爵一級十年封永康公後主即位立為皇太子允性聰敏好學執經肄業終日不倦博通大義兼善屬文時張貴妃孔貴嬪並愛幸沈皇后無寵日夜構成后及太子之短孔範

之徒又於外合成其事禎明二年廢為吳興王加侍中
衛將軍入隋卒于長安

南平王嶷字承岳後主第二子也方正有器局年數歲
風采舉動有若成人至德元年立位揚州刺史遷都督
郢州刺史入隋卒于長安

永嘉王彥字承懿後主第三子也至德元年立位都督
江州刺史入隋大業中為襄武令

南海王虔字承恪後主第五子也至德元年立位南徐

州刺史入隋大業中為涿令

信義王祗字承敬後主第六子也至德元年立位瑯琊彭城二郡太守入隋大業中為通議郎

邵陵王兢字承檢後主第七子也禎明元年立入隋大業中為國子監丞

會稽王莊字承肅後主第八子也容貌最陋性嚴酷數歲時左右有不如意輒剗刺其面或加燒爇性嗜酒愛博以母張貴妃寵後主甚愛之至德元年立位揚州刺

史入隋大業中為昌隆令

東陽王恠字承厚後主第九子也禎明二年立入隋大業中為通議郎


吳郡王藩字承廣後主第十子也禎明二年封入隋大業中為任城令

錢塘王怙字承悌後主第十一子也禎明二年封入隋卒于長安江左自西晉相承諸王開國並以戶數相差為大小三品大國置上中下三將軍又置司馬一人次

國置中下二將軍小國置將軍一人餘官亦准此為差
武帝受命自永定迄于禎明唯衡陽王昌特加殊寵至
五千戶自餘大國不過二千小國則千戶云



通志卷八十三下



總校官庶吉士臣侍朝

校對官庶吉士臣陳文樞

膳錄監生臣魏綿曾